



D'Optimis dari Jabatan Pendaftar juara KIK

Jabatan Pendaftar, Universiti Malaysia Pahang (UMP) buat kali ketiganya telah berjaya menganjurkan Konvensyen Kumpulan Inovatif & Kreatif (KIK) peringkat UMP pada 8 Disember 2011 bertempat di Dewan Astaka, UMP.

Sebanyak 11 kumpulan yang mengambil bahagian mewakili Pusat-pusat Tanggungjawab (PT) masing-masing telah berentap pada konvensyen berkenaan. Kumpulan yang terlibat adalah Savemore Team, Ichiban dan Paradigma (Fakulti Kejuruteraan Elektrik & Elektronik), Regstar dan D'Optimis (Bahagian Pengurusan Sumber Manusia, Jabatan Pendaftar), NetIG dan BAPM – Kaizen (Pusat Teknologi Maklumat & Komunikasi), Synergy II (Jabatan Penyelidikan & Inovasi), Prodigy (Jabatan Perpustakaan), BMW (Pejabat Naib Canselor) dan KIK-M (Pembangunan & Pengurusan Harta).

Kumpulan D'Optimis dari Bahagian Pengurusan Sumber Manusia, Jabatan Pendaftar telah dinobatkan sebagai juara dengan tajuk projek "Mempercepatkan Proses Permohonan Pelanjutan Pas Pegawai Dagang di UMP", berjaya membawa

pulang wang tunai sebanyak RM3,000, sijil penyertaan, piala pusingan dan cenderahati iringan.

Menurut Ketua Kumpulan D'Optimis, Lily Azwati Abd Latip, projek itu bermatlamat untuk mewujudkan satu sistem rekod, dokumen dan data Pegawai Dagang yang tersusun dan sistematik, penyampaian maklumat yang berkesan serta memberi perkhidmatan yang baik kepada Pegawai Dagang di UMP.

"Projek ini juga telah berjaya mencapai kehendak Piagam Pelanggan Bahagian Pengurusan Sumber Manusia dan memberi impak positif kepada pengurusan Pegawai Dagang di UMP," katanya.

Manakala tempat kedua pula dimenangi Kumpulan NetIG yang mewakili Pusat Teknologi Maklumat & Komunikasi (PTMK) telah menerima wang tunai sebanyak RM2,000 berserta sijil dengan tajuk projek *SMS Task Report Alert*.

Fokus projek kumpulan ini adalah penambahbaikan sistem penerimaan aduan kerosakan teknikal dengan memperkenalkan penggunaan aplikasi *Yahoo Mobile Messenger* untuk menghantar

aduan-aduan ke telefon bimbit staf teknikal PTMK.

Sistem ini ternyata dapat meningkatkan tempoh masa penyelesaian aduan yang diterima oleh pihak berkenaan.

Kumpulan Paradigma dari Fakulti Kejuruteraan Elektrik & Elektronik (FKEE) pula mendapat tempat ketiga yang membawa pulang wang tunai bernilai RM1,000 berserta sijil dengan projek *FKEE Smart Lab Monitoring System*.

Kumpulan ini telah berjaya mereka cipta sistem pengurusan makmal yang cekap, dapat menjamin keselamatan makmal dan seterusnya membantu mengurangkan risiko kehilangan peralatan makmal.

Konvensyen kali ini dihakimi oleh barisan juri yang terdiri daripada pihak Perbadanan Produktiviti Malaysia (MPC) Wilayah Pantai Timur, Majlis Perbandaran Kuantan dan Universiti Teknologi MARA (UiTM) Cawangan Shah Alam.

Sekalung tahniah diucapkan kepada kumpulan yang berjaya dan syabas kepada kumpulan yang kurang bernasib baik di atas kesungguhan dan komited menyertai konvensyen kali ini.